

Muhyiddin: Malaysia Terus Beri Sokongan Padu Kepada Rakyat Palestin Di Gaza
Bernama
August 12, 2014

SEPANG, 12 Ogos (Bernama) -- Timbalan Perdana Menteri Tan Sri Muhyiddin Yassin berkata Malaysia akan terus memberi sokongan padu serta menyalurkan bantuan dan pertolongan kepada rakyat Palestin di Gaza.

Beliau berkata pelbagai inisiatif telah diambil untuk terus meneruskan membantu rakyat Palestin termasuk mengumpul dana dan sumbangan sehingga hari ini.

"Kita telah menunjukkan kepada dunia walaupun Malaysia sebuah negara kecil tetapi kita mempunyai semangat berjuang yang tinggi untuk membantu rakyat Palestin bebas daripada cengkaman Zionis.

"Kita akan terus sedaya upaya membantu demi saudara-saudara kita di Gaza. Inilah komitmen kita. Saya menghargai segala sumbangan yang dibuat Biro Kebajikan Umno, khususnya sukarelawan dan doktor yang tampil membantu," katanya.

Sebelum itu, Muhyiddin hadir pada majlis pelepasan kumpulan sukarelawan Misi Bantuan Kemanusiaan Biro Kebajikan Umno/Kelab Putera 1Malaysia (KP1M) ke Palestin di Lapangan Terbang Antarabangsa Kuala Lumpur (KLIA) di sini hari Selasa.

Turut hadir bekas Perdana Menteri Tun Dr Mahathir Mohamad, Presiden KP1M Datuk Seri Abdul Azeez Abdul Rahim, Duta Mesir ke Malaysia Salleh Mohi Eldin El Wassimy, dan Duta Palestin ke Malaysia Dr Anwar al-Agha.

Muhyiddin berkata Malaysia mengutuk dan menentang segala bentuk kezaliman Israel terhadap rakyat Palestin di Gaza yang telah menyebabkan ramai orang awam yang tidak berdosa terkorban.

"Itu bukan satu kenyataan dan perasaan tetapi ia menunjukkan keikhlasan kita untuk membantu rakyat Palestin.

"Sehubungan itu, pasukan sukarelawan Malaysia telah membawa makanan dan ubat-ubatan untuk meringankan penderitaan rakyat Palestin. Ini dilihat sebagai satu langkah keikhlasan kita untuk membantu rakyat Palestin.

"Ini bukan misi yang mudah kerana banyak cabaran dan bahaya namun pasukan sukarelawan Malaysia sedia berkorban untuk membela nasib rakyat Palestin di Gaza," katanya.

Muhyiddin juga menyampaikan ucapan penghargaan dan terima kasih kepada Biro Kebajikan Umno dan KP1M serta para sukarelawan yang terlibat dalam misi kemanusiaan ini.

Beliau juga melahirkan penghargaan kepada kedutaan Palestin dan Mesir yang memudahkan perjalanan.

"Misi ini merupakan satu cabaran besar dan saya doakan misi ini berjaya dan dapat menyalurkan sumbangan kepada rakyat Palestin di Gaza dan selamat pulang ke tanah air," katanya.

Misi kemanusiaan KP1M telah membawa 40 tan bekalan makanan dan ubat-ubatan bagi membantu rakyat Palestin yang sengsara selepas serangan kejam Israel.

Misi kemanusiaan ini yang disertai 71 sukarelawan termasuk pakar perubatan dan pengamal media dijangka pulang ke Malaysia pada 21 Ogos nanti.

Sementara itu, Dr Anwar berterima kasih kepada rakyat Malaysia yang berdiri teguh dan sentiasa menyokong rakyat Palestin di Gaza.

"Terima kasih khas ditujukan kepada Perdana Menteri Datuk Seri Najib Tun Razak. Rakyat kami menghargai bantuan ini," katanya.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1059859>